



یکرمی بش سنه اول یانیه واشقودره ولایتلری مالیه مفتشکلندمه
بولندینم ائشاده اشقودره مجموعه لرنده سلطان مصطفای ثانی و کنج سلطان
عثمان ثانی نك زماننده کی فترتلری مصور اولمق اوزره اویسی نامنده برذاتك
۱۰۳۷ حدودنده غایت حمیتکارانه یازلمش بر منظمومه سنی کورده رك مجموعه مه
قید ایلشدم . صوکره بو منظمومه بی استانبول کتبخانه لرنده کی بعض
مجموعه لرده دخی مقید کوردم . شمیدیکی زمانده کوریلان غریب حاللره
پك چوق اعتراض ایدیورز اما اوچیز سنه اولکی شو حاللره ده نظر ایدرسهك
او وقتلرده کی حالیمزك دخی شمیدین پك ابی برشی اولمدیغی وشو حرب
مشومه اشتراك ایدلماش اولسیدی بلکه اوزمانلردن دها ای اوله جنی
شو منظمومه نك مقایسه سیله آکلاشیلیر ایشته عیناً منظمومه .

کفته اویسی در احوال زمان

الا ای قوم استامبول بیلک تحقیق اؤلك آکام
ایریشور ناکهان برکون سزمه خشم ایله قهرالله
قیامت قوپدی سزدنیادن ال چکمز اوصانمزسز
زمانه مهدی دوریدر نزول ایتمکده روح الله
یاپوپ دنیا اوین ویران ایدرسز خانه دینی
نه فرعون یابدی نه شداد بنالر بوشکل بالله
بیچه بیچاره نك ظلماً ییقارسز خاطرین هر دم
دکلی مؤمنك قلبی آظالم یوقسه بیت الله
یتیمه شفقت ایتمزسز آلورسز کوز کوره مالن
دکلی حاضر و ناظر بوکا راضیمیدر الله
فغان و آهی مظلومك اکرکیم کوکله ایرنه
ترحم ایتیموب اصلاً دیمزسز یرده قالز آه
نه دینه طاپدیکز بیلم نه مذهب طوتدیکز حاشا
اماملر قولنه اویمز بنورمن درت کتاب الله

نه شرع اللهه تابعسز نه خود قانونه قائلسز
 جهانی درلو بدعتله فساد ویردیکز بالله
 قضاء احوالنی دیرسک نه ممکندر بیان ایتمک
 اگر خصمک اولورسه قاضی یاردیجک اوله الله
 قوروب بردام نزویری قومشر محکمه آدین
 قنی سجاده احمد قنی احکام شرع الله
 بوکون تحقیر ایدوب دینی ایدرسز حیلۀ شرعی
 شفاعت ایلمز یارین سزه آمدۀ حبیب الله
 عجب منکر میسز حشره قیامت یوقسه قوپمازمی.
 سزه یا اتم دیرمی بوفعل ایله نبی الله
 زمانه اویدی نسوانه ویرله ی ایشلر اوغلانه
 اکابر طاپدی همیانه اولوب یعنی عدوالله
 استانبول قومنک ظلم وفسادی جمله دن ارتق
 بودر غم چکدیکم قورقم ایریشه بر بلا ناکام
 یهودی کبی فاسقلر کیچرلر صدره بی تکلیف
 قبودن باقسه بر مؤمن ایدرلر آندن استکرام
 ندندر بویله خائنلر امانت صاحبی اولمق
 عجب هیچ اهل اسلامده بولنزمی امین الله
 چاقلدی چیقمق فتنه طوتشدی بستیون دنیا
 یجه اولاشمسون! آتش بکم استانبوله هرکام
 بوزولماسنه دنیانک سبب پاشا و آغادر
 فساد و فتنه یه باعث بولاردز شهسز همراه
 جهانده خرسز وهم یول کیچی دیر ایسن کیمدر
 عسس باشی صوباشیدر بوکا بویله اینان بالله
 بولاردن داخی ظالمدر افندی قاضی عسکرلر
 جهانی ارتشالره فساد ویردیلر ایوای

بالق باشند قوقار دیرلر فسادك باشی خود معلوم
 نهقادر نطقه برکیمسه دیه هذا کتاب الله
 حضور حقه وارد قدم اولورسز اولاً مسئول
 سزه تفویض اولمشدر امانتدر عبادالله
 وزارت صدرینه کچمش اوطورمش بر بلوک حیوان
 بودین ودولته خدمت ایدر یوقی بر آدم واه
 نیچون کیزلندی عارفلر بیلنمز اولدی کامللر
 کورنمز اولدی هپ شمدی سکوته واردی اهل الله
 نیجه فتح اولیسر بغداد اماملر ایلمز امداد
 بولاردن یوزچویرمشدر عزیزم اولیاء الله
 صراط مستقیم اوزره دکادر شیخ وواعظلر
 صابجه رهنا یولدن نیجه خلق اولسون کمره
 مراثیلر طوتوب دهری صانورلر خالیدر دنیا
 ولی هر کوشه ده واردر نیجه بیک عارف بالله
 کرک وعظ وخطابتلر کرک درس واماملر
 ویرلش اولسه اجرتسز اوقنورمی کتاب الله
 نه دیرلر سه دیسونلر هیچ قایرمازلر بومنکرلر
 بحمد الله والمه ویرلدی بکا کنزالله
 کوکلده ذرمجه یوقدر غرض واللهمی باللهمی
 بتون دنیا به خدمتدر مرادم فی سبیل الله
 (اویسی) چکمه غم یاقلاشدی دم بر صاحب شمشیر
 ظهور ایتک مقرر در با امر الله ، باذن الله [۱]

[۱] بو منظومه نك انشادنن بر ایکی سنه صکره سلطان مراد رابع
 حضرت تلیک فساد و فتنه و تزویر اربانه نعل قلیچ آندینی اصحاب توارینه معلومدر .